



商文毅公集卷之八



後學漢陽劉體元編輯

浦城徐一成校正

序生徐大勺同校

誌銘

贈資善大夫禮部尚書謚文安劉公墓誌銘

公姓劉氏諱定之字主靜別號保齋曾祖溪其遜弗
仕祖元傑贈工部右侍郎兼翰林院學士父髦以易
經魁鄉薦學者稱為石潭先生累贈工部右侍郎兼
翰林院學士母楊氏累贈淑人生母留氏累封太淑

人劉之先自安福荆山徙居永新藥湖至元傑贅居于此子孫因家焉公自幼天資卓異書過目成誦石潭先生日授以書而不令作文字公每私為之後因疾先生往視於几上乃得所為祝竈文及詠桃漿諸詩始大驚異然未嘗口許之也一日酒酣坐堂上公以所作文字進先生顧謂太淑人曰此子有八面受敵才宣德癸丑補邑庠生乙卯中江西鄉試明年會試第一人廷試賜進士及第授翰林院編脩乙未京城大水 詔求直言公上十事大要謂號令賞罰宜信公卿侍從宜時常召見降胡宜遷近南地京官宜

出任郡縣朝官陞職宜令舉賢自代武官子孫宜習韜略廷臣丁憂宜終制僧尼蠹政宜過絕奏不報已而丁石潭先生憂服闋陞侍講己巳北虜犯順公復上言十事如戰陣守禦選將遣使總覽權綱 經筵進學所言皆切時政 朝廷嘉納之庚午充 經筵官壬申陞司經局洗馬仍兼侍講時北虜遣使來朝因邀我使往報廷議不一公復上疏備陳前代所以待夷狄之道與今日國勢之強弱事理之順逆以為宜暫遣使以羈縻之使我得以修內治所言曲盡事情預修寰宇通志進右春坊庶子兼職如故 英廟

復位改通政司右叅議 命代祀中嶽登漢光武諸
陵尋改翰林學士脩大明一統志為副總裁 今上
嗣位進太常少卿翰林侍講學士兼 經筵官纂脩
英廟實錄充副總裁丙戌冬入 內閣預知機務明
年實錄成陞工部右侍郎兼翰林院學士又明年陞
禮部左侍郎仍兼學士 賜二品服未幾得疾疏乞
致仕不允 命賜楮幣藥物遣醫診視至再竟不起
遂卒時成化己丑八月某日距生永樂己丑十二月
十七日壽六十一訃聞 上悼嘆 遣使致賻鈔萬
緡贈資善大夫禮部尚書謚文安命工部造墳兵部

給驛舟歸其喪至塋復 命所司致祭公天分既高
而石潭先生庭訓尤嚴故其學自六經子史下至百
家之書靡不精究為文累數百千言操筆立就且隨
事變化如驚濤怒瀾勢莫能禦由是名重士林四方
求其文者日接踵於門公悉應酬不厭所著有易經
圖釋十二卷宋論三卷策略十卷保齋存稿十一卷
續稿五卷藏稿六卷前稿六卷兩京鄉試禮部會試
者各一次讀廷試卷者二教庶吉士者三公性孝友
微時苦家貧嘗授徒於鄉資束修以養二親既入仕
即分俸歸養而自處儉約無異寒素後俸入頗給始

迎太淑人就養京師為編修時嘗乞歸省修葺先廬
與諸弟共之諸弟經公指教若今湖廣叅議主敬鄉
貢進士主仁泰州學政主義皆事公如嚴父居官耿
介議論不苟與人交始終以誠比易簣惟諄諄以弗
克報 上恩及終養老母為言其篤於忠孝如此先
娶賀氏封孺人累贈淑人再娶張氏封淑人子男八
稼廬州府通判稱邑庠生賀出穡國子生穡種張出
穡穡稿側室馬出女六孫男二曾孫男二稼扶柩南
還將以巳丑年十二月日附塋石潭宅後先塋奉春
坊庶子劉紹和狀來乞予銘正統丙辰予與公同試

禮闈後同官翰林今又同處 內閣雅相好也銘豈
可辭遂按而銘之銘曰義山之靈禾水之清秀鍾於
人賢傑挺生廷訓服膺經史研精文思雲蒸才藻天
成進擢高科入直承明典司 帝制黼黻治平密贊
皇猷式竭忠誠胡不百年遽以疾傾恩禮隆備實出
聖情吁嗟劉公未播芳名

太子少傅兵部尚書白恭敏公墓誌銘

公諱圭字宗玉姓白氏先世磁州人後徙隆慶再徙
真定之南宮因家馬曾祖文舉隱弗仕祖進忠仕元
千戶以公貴累贈資政大夫兵部尚書妣馬氏贈夫

文毅公集 卷之八
人父友諒累封資善大夫工部尚書兼郭氏贈夫人
繼何氏封夫人公自幼天資優偉識度過人進補邑
庠生從博士姚江沈彥常受易早夜討論得其旨趣
為文有奇氣一時倫輩皆自以為不及遂領鄉書擢
魁禮闈登進士時正統壬戌歲也明年除江西道監
察御史甲子胡虜寇邊分兵討之公奉命監軍由
喜峰口出虜聞風遁去破其巢穴而歸丁卯按山西
威惠並行辨疑獄至三百餘事皆出人意外已虜
復犯順廷議擇人分守要害公得澤州募壯勇造器
械朝夕訓閱以俟勤王之舉會虜退乃還是年冬陞

陝西按察副使獄有冤囚久不雪公一訊得其情遂
破械縱之民有掠官糧為食者有司置之法公惻然
曰民飢至此字收之過也杖其為首者而已景泰壬
申陞浙江右布政使處賊鄭懷冒爵號公與擒捕功
有銀幣之賜民徐某與富室有讐富室被盜連逮
之徐不勝拷掠証服公為直之遂釋徐而坐富室以
罪浙右大飢徵稅甚急公請諸朝蠲之復勸富民
出粟賑濟民得免於流徙天順戊寅遷都察院右副
都御史奉勅巡撫湖貴時東苗作亂據石門公督
兵進勦獲其偽王干把猪阿王榜斬首數萬級餘黨

悉平會有勅督造湖廣戰艦衆議欲賦於民公以楚府抽分甚富具啓量借數月事賴以濟庚辰改兵部右侍郎北虜孛來寇莊浪總兵仇廉失利虜勢熾甚公往督兵至固原與賊遇以寡擊衆虜退走公率衆殲之獲虜二十餘人牛羊萬數追至花馬池海納都連戰連捷虜懼請和西兵遂解壬午慈壽皇太后崩俾公營塋事事竣受銀幣之賜癸未陞工部尚書甲午英廟升遐奉勅營建裕陵復受銀幣之賜成化丙戌荆襄流賊嘯聚上命撫寧伯朱永率兵往勦公奉勅提督軍務躬冒矢石設奇

累敗賊衆斬首數萬級生擒偽王劉千斤偽軍師康子云等縱其脅從數千人班師之日聞工部府君計乞守制詔許奔喪公啣哀歸塋塋之日有白鶴數十旋逸墓所人以為孝感所致丁亥加太子少保陞從一品俸兼兵部尚書驛召至京命不妨部事同定襄伯郭登等操督十二營公至辭所加官并請終制不允戊子賜玉帶寶刀麒麟金織衣會彗見求直言公以民情不和致天變異伏乞命大臣巡行天下黜貪酷旌賢良以和民情庶幾天意可回己丑滿考賜誥褒美贈祖父如巳官辛卯寢疾上遣

中官 賜羊酒敬疏 命御醫診視壬辰考滿

賜鈔三千貫癸巳丁何夫人憂 詔堊畢赴京

賜鈔三千貫為道里費未幾 詔還甲午閏月公復

寢疾 上兩遣中官 賜酒菓敬疏 命醫視疾八

月虜寇宣府命公力疾出視事已而疾轉甚醫藥弗

効屢乞骸骨弗許遂以十二月辛丑卒于京師之第

上聞訃震悼遣中使 賜賻鈔萬緡贈祭祿大夫少

傅謚恭敏遣官 諭祭 命有司營葬事以其子鑰

為錦衣百戶公生永樂己亥四月癸卯年五十有六

娶秦氏先公三十年卒累贈夫人生男一即鑰女一

繼孟氏累封夫人生男四鉞庠生銓國子生銳鈞尚

幼女二孫男一孫女四公器宇英拔才識優長裁度

邊務動中機宜難羽檄交至未嘗倉皇失措嘗以兵

行糜費害及地方故比年師旅簡出邊將不敢邀功

四方賴以無事尤篤於孝友厚於故舊與人交關心

見誠曾無宿怨同官有喪竭力為之經營且捐貲助

之嘗舟行荆湖江中晚遇大風舟幾覆人呼號求救

公曰夜靜何所救乎我馳驅國事至此豈無天命汝

等號呼何益既而迤邐登岬舟即沈在貴州時人有

憤中使嚴酷夜持刀欲刺之誤入公所擁衾問曰汝

何人刺者驚曰誤矣即抽刃自刎仆於地公呼左右秉燭傳以善藥遣之畧無怒意其性度容物類如此鑛等扶柩歸南宮卜以卒之明年某月日葬于白塔先塋之次奉工部尚書王公所述事狀造予請銘因為次序大略而系之銘曰哲人之生夫豈偶然寔維先世積厚慶延南宮善地豈無才賢科目寥寥殆將百年挺拔自公振後光前位隆八座功著三邊雄才卓識稟之自天運籌決勝動中機先簡在帝心委任益專彼蒼不憖胡奪之過其身雖亡其名永傳吁嗟恭敏復何憾焉南宮之山逶迤蜿蜒卜塋有石壘於

綿綿

封左春坊庶子兼翰林侍講徐公墓誌銘

公諱琳字廷璽姓徐氏世家常之宜興曾祖千六隱弗仕祖福以子貴贈戶部郎中父鑑瓊州知府母吳氏封宜人公天性孝友自幼器宇不凡十歲瓊州知府官南京應酬門戶儼如成人一日府君退朝不樂公問之為祖母病於家遂請奉吳宜人歸省時年十二衆驚異之已而府君扈從留北京以夏尚書諫北征坐逮下獄公聞倉皇就道抵揚州值冰凍即舍舟陸行至京舍逆旅終日惴惴夜卧脇不帖席如是

者三年會 仁廟登極赦始歸後府君官海南卒公
迎喪歸塋龍潭山山深多猛獸方開壙一虎躍出人
皆駭散公拜且泣曰衆為我父供後寧啖我母傷人
虎遂俛首去人以為孝感所致吳宜人病逾年公日
夜侍湯藥弗離側及卒哀毀過禮初府君歿衆子幼
公極力撫教為畢婚娶比長求分不能止田宅器具
恣其所欲從姪早孤撫教亦如之及以盲廢業復買
田贍給為育其子嫁其女骨肉之間恩義兼至公早
有志用世以父歿弗果家居嚴於教子諸子出就外
傳暮歸必程督其業之勤怠長溥進士及第授翰林

編修公喜曰先人遺言子孫勿復為刑官見今免矣
數貽書訓以居官守身之法溥嘗再告歸省公趣令
還 朝曰委身事君宜力圖報稱何以私恩為念哉
溥分祿歸養公曰吾家幸足用此祿宜推以給姻族
之貧者率以為常遇歲歉必減租焚券發倉廩以賑
濟鄉人前後所出粟不啻萬餘石賴以全活甚衆雖
例有旌典不受始公在北京有老醫史仲文者里人
也妻死以遺骨托公歸渡江風濤驟作舟人皆有異
索之同行知者密勸公棄水中公不應終獲以濟正
統間里中苦糧長掊剋群懇于巡撫願得公代公力

辭不就公素長者然性剛直是非無所徇人有不平
事多質於公邑大夫有問則以吏弊民隱為言不及
已私鄉人以軍役致訟連年吏受甲某私以坐乙事
千里鄰公諭甲俾認之甲不聽罄貲與吏得釋後二
十年部使者廉得其情卒以軍歸甲時貲產已盡悔
不用公言景泰甲戌邑大水里胥冒報傷重數多率
分諸大家要厚利以免徵三百石歸公公謝曰吾家
田實不滄敢欺公乎其人慙愧而去縣東南郭二里
許曰泮溪公愛其山水清勝且密通先塋遂自城中
遷居之堂構宏壯貽謀深遠前當查林黃瀆諸鄉孔

道公為造橋脩路以便行旅復造西渡以濟病涉割
善地為義塚以葬親戚之貧無歸者公善綜理家務
未嘗萌毫髮兼并意而產業日增有以田來售者率
厚償其直典質不能贖者有所求輒還之每戒子孫
以守禮法務質樸絕去浮靡之習平生不置妾媵衣
服飲食無所擇惟祀先宴賓極於豐腆晚年以家事
付諸子數從溪翁野老游狎自置剡南漁隱以示遺
世之意客至必置酒張樂酣嬉竟日言不涉時事滄
浦有山曰瑞雲預營壽藏其間并構福源寺為往來
游息之所讀書務求大義不泥章句陰陽醫卜亦皆

涉獵論議慷慨事之得失及後來成敗歷歷有驗雖
智教過人然能持大體一裁以正人有過能優容之
以故人無貴賤老少皆知敬愛公及道公之德弗衰
公以溥貴初封文林郎翰林編脩進封奉政大夫左
春坊左庶子兼翰林侍講配何氏初封孺人進封宜
人子男四溥歷編修進庶子兼侍講其名位未量濟
淪澍皆克家女三孫男十孫女四公生洪武乙卯七
月日今年壽七十三何宜人亦壽躋七十先是溥求
同朝士夫詩文歸為二親壽不意公遂遘疾以卒成
化辛卯某月日也訃至溥號慟欲絕即日解官歸奉

喪事 上聞特遣官賜祭溥以中書舍人李應禎狀
來乞銘將卜卒之明年月日塋公瑞雲山并刻石藏
之銘曰人之寔行莫先孝弟天降是衷匪由外至卓
哉徐公克全所昇孝親一念發於幼穉推而友于擴
而慈愛息周宗族惠施鄰比信友忠君皆自茲始吁
嗟徐公鄉邑善士積厚發宏徵於令子存沒光榮褒
典未已琢石鐫銘以詔來嗣

太子少保吏部尚書姚文敏公墓誌銘

成化癸巳二月九日太子少保兼吏部尚書姚公卒
先是 上遣太醫院判竇瓚來視疾繼遣中官賜羊

酒米蔬 命贖日一視之至是訃聞 上震悼賻鈔
萬緡贈榮祿大夫少保謚文敏 命禮部尚書鄒幹
諭祭又 命自初喪至葬皆遣官祭 勅工部營葬
事兵部具舟歸其喪 恩典甚厚公之子璧奉學士
王惟臣狀屬予銘嗚呼予與公交好踰三十年以道
義相規約以古正人君子相期待方賴公啓益期以
進於晚成而公棄予此予之所以哭公者其能已於
情乎嗚呼予詎忍銘公墓哉雖然公之墓非予銘其
誰因序而銘之按狀公諱夔字大章號損庵姓姚氏
先世居汴宋南渡徙家桐廬族敦詩禮代有聞人曰

榮祿者以文行知名乃公七世祖也曾祖鼎祖伯華
父惟善有隱德以公貴祖父皆贈資政大夫禮部尚
書祖妣楊妣申屠皆贈夫人公生穎異一歲失怙申
屠夫人極力撫教三歲口授孝經論語輒能記誦八
歲就外傳已鏡然有志於學十三游邑校從楊長教
瑛李司訓伯璵受春秋晝夜淬礪通貫經史為文雄
健有奇氣下筆滔滔數千言弗窘李君嘗語人曰一
夔足矣正統戊午舉鄉試第一會試辭乙榜入太學
進業時祭酒李公時勉司業趙公琬一見知為偉器
待以殊禮少保南郡楊公溥尤加異賞因遣子壻從

學公間游劉忠愍公之門劉許與尤至壬戌會試第一與從弟龍同登進士時人榮之癸亥擢吏科給事中首疏八事謂修聖德舉賢才考察有司慎選風憲寬誥勅之限革監庫之弊立謚法以勸賢銓教職於便地多見採納甲子夏旱奉命祀北鎮雨應時至都御史王公翱鎮其地喜曰此所謂隨車雨也為立碑於廟乙丑秋母夫人疾醫弗效公願天願以身代尋瘞丙寅持節冊封晉府徐溝等王夫人以疾卒公以不獲奉湯藥為恨號慟屢絕奉柩南歸居喪盡禮遠近從游士雲集多所造就服闋復舊任己巳

英廟北狩國勢危疑群臣勸郕王進議未決詢諸六科公曰朝廷任用大臣正為社稷計何必詢諸小官衆乃詣文華殿懇請事遂定十月虜大舉進逼京城衆議戰守不一公言兵敗之餘人心未定只宜固守伏兵歸路擊之遂上疏遣人間道齎勅宣府遼東令總兵官楊洪曹義各選勁騎刻期以進與京軍內外夾擊未幾洪義果統所部兵來賊聞一夕遁去景泰庚午春廷臣交章薦公才堪大任陞南京刑部右侍郎階嘉議大夫時刑部規矩廢弛公一以嚴肅正之獄無滯囚辛未蒙賜勅以前任給事中

贈其父母贈孺人妻王氏封孺人壬申改南京禮部
奉 勅考察雲南官吏黜陟允當癸酉還 朝遂留
禮部尋賜 誥進通議大夫加賜祖父如其官祖妣
妣贈淑人妻封淑人丁丑春 景皇帝不豫尚書胡
公澐在告公強之出十四日率文武大臣於左順門
問安退集東閣議立 皇太子 上疏懇求未允次日
公欲率百官伏 闕以請是夕與予議定遂歸與王
夫人決十六日早三鼓至朝房公屬予具本稿有
陛下為宣宗章皇帝之子當立 宣宗章皇帝之孫
正位東宮等語公躍然舉筆於立上添一復字時同

官鄒公幹等俱稱善已而入朝衆議合文武大小官
僉名且一樣寫二本因遲延至十七日早變作弗果
進 英廟復位石亨輩竊弄威權勢焰可畏公視之
如常亨恨其不附已乘間調公南京禮部 英廟素
知公為人且聞正月立儲之議未幾驛 召至京
賜一品服轉禮部左侍郎戊寅調吏部有真定守以
舊賄敗亨挾勢囑復其官同列附亨者令擬准藁來
判公擲筆大言曰吾寧不做侍郎必不判此藁事竟
止後亨敗附亨者降黜而公之名益重癸未遷禮部
尚書階資善大夫公詳雅敬謹明於典禮克稱厥任

文獻公集 卷之八 十四
上深嘉之甲申今 上嗣位命侍 經筵賜白金文
綺寶楮成化乙酉 上耕籍田 幸太學皆從公所
請宴賜有加丙戌會試公知貢舉預陳數事以杜僥
倖閏三月進資政大夫贈封祖考以下皆如制八月
公率群臣上封事其略曰 皇上當念祖宗之付託
思天下之艱難勿以目前無事而姿于宴安肆于逸
樂以禮法齊家以節儉制用官爵無濫授金帛無妄
費土木勿妄興齋醮勿頻設出入有防巡遊有度節
嗜飲養天和留心萬機無忘政務 上嘉其言慰諭
甚至丁亥正月 賜金織麒麟文綺七月以災異數

見乞致仕 上曰卿謹慎老成朕方信用不允辭職

朝鮮進海東青公言非故事宜下 詔自今非常貢

之物不得進以示不寶遠物之意戊子四月以災變

率群臣上疏言 皇上春秋鼎盛而震位尚虛宜均

愛六宮以繁子嗣乞罷西山所建之塔斥田阿叱哩

之流留心 經筵裁決政務親君子遠小人服食言

動悉遵 祖宗舊規庶回天意嘉納之 慈懿皇太

后崩卜葬有異議內閣執不可繼之以疏事下禮部

公率群臣覆奏詞甚懇切有曰山陵 宗廟聖孝所

先綱常典禮 國家攸重萬一合葬祔廟之禮少有

疑沮關係非細豈能保其將來無撓理改而從正者
上覽感泣卒從其議九月彗星見公辭職不允己丑
會試公為知貢舉官三月上疏乞祭先塋上曰卿
老成當朝夕輔朕未可言私六月遷吏部尚書進資
德大夫正治上卿公熟於政體釐正庶務剗革宿弊
品藻人物進退惟公中外稱慶以為得人庚寅雨雪
失時公率諸司條列政務其末具言可憂之事以異
感激辛卯秋加太子少保遣中官賜羊酒寶楮是
冬彗出軒轅公上疏反覆諷諫言無所諱壬辰南方
大風雨水溢公疏言自前歲彗星示變以來四方漸

覺多故

朝廷處置事宜往往不為深遠之圖自古

禍亂常起於灾傷饑饉之餘毋謂天道姑息有象無
應只圖因循便安於目前也 上是其言會禮部即

會議施行公自是憂形於色食不甘味上疏乞罷歸

田里不許已而病作日已愈甚臨終謂壁曰吾受

國厚息不克圖報死後勿隨例請葬祭以重吾過言

弗以私比卒自公卿大夫以及閭巷士皆為揮涕吊

祭填門殆無虛日公丰神秀朗器識宏偉言論侃侃

平居接人開心見誠汲引人才惟恐不及自奉儉素

雖貴無異寒士天性孝友每語及二親輒嗚咽流涕

處兄弟無間言視群從猶已子遇宗戚中貧乏者濟
之無德色文章豪宕經書疏義學者宗之立朝三十
餘年憂國之心老而彌篤每當廷議正色昌言
人皆敬服說者謂公可屬大事正直弗徇如古周勃
姚崇其人誠知言哉公著述甚富所存藪蠹准稿一
十卷公生永樂甲午月日享年六十配夫人王氏同
邑名家女有賢德子男三長即璧甲申進士兵部郎
中娶趙氏次璽國子生娶子女皆王出次瑩側室金
出女四孫男三孫女二公之葬以卒之明年閏六月
日墓在邑金牛山之原銘曰桐山秀拔桐江澄澈儲

和華精挺生豪傑養氣剛大立志卓越問學該博文
章峻潔屢魁多士遂登禁闈正言讜論有裨衮闕春
官冢宰位望隆赫直諒如崇重厚如勃允矣蓋臣天
胡遽奪忠在國家名垂簡冊嗚呼文敏無愧前烈

中憲大夫右僉都御史徐公墓誌銘

都察院右僉都御史徐公以成化辛卯月日卒于家
其子昇時任南京刑部主事聞訃號慟亟歸治喪事
已而奉同官馬愈狀來乞銘按狀公諱瑄字子敬姓
徐氏蘇之嘉定人高祖道瑞曾祖廷王祖公行世有
積德父茂宗累贈右僉都御史母王氏贈恭人公天

資秀穎自幼嗜學薦於孝弟年十八已有才名進補
邑庠生從師授易研極理趣業以大進正統戊午發
解京闈已未丁內艱乙丑登進士第觀政都臺尋以
外艱服闋授四川道監察御史諳練老成臺端推重
景泰庚午奉命捕京畿盜賊法令嚴明奸宄屏跡
壬申巡視山海關武備整肅內外寧謐癸酉出按西
蜀丙子復按東廣所至徧歷郡縣問民疾苦禁戢貪
暴疏滌冤滯人心懽悅天順戊寅北虜犯我西鄙
上特陞公右僉都御史勅使巡撫延綏慶陽諸處
兼贊理戎務公至奉宣朝廷威令訓練士馬撫輯

兵民偕一二鎮守總戎大臣同心協謀出奇應敵初
與賊戰於李羅池溝繼追至卡坡墩明年戰於金雞
峪又明年戰於山海子斬獲無算賊遁去公籌畫之
功居多上聞而嘉之累賜璽書金幣慰勞公益
加感激申嚴戍守督理屯田廣積儲餉修明學政使
人曉然知尊君敬上之義一時士風為之變易無何
聞繼母顧氏喪乞還守制上以西事未寧奪情不允
自是出入邊疆觸冒風霜荐罹寒疾甲申上疏乞致
仕辭極懇至遂得請而還因念久歷仕途曠於祀事
即居第左偏創祠堂以備薦享延師就家塾訓誨子

孫處卿黨有禮撫族姻有恩遇患難者扶翼之見貧
乏者賑卹之或與梁朽壞不便於行者脩建之其急
於為義類此初號順貞後於城東西各買田築室為
遊息所更號野莊道人時與縉紳士夫往來宴會徇
狎自適人謂有香山洛社遺風公生永樂壬辰九月
日享年六十訃聞 朝廷特遣官即其家祭之配李
氏有賢行封恭人子男四長即得由進士擢今官孝
友敦厚所造未涯次冕入粟授承事郎皆李出勗邑
庠生冕幼皆次室鄭陳出女二孫男五孫女三曾孫
男一得等卜以卒之又明年三月日奉塋邑城西練

祈塘之原附先塋也予與公同舉進士同官於
朝相知為深而得又余讀卷時進士執年家子弟之
禮甚恭遂不復以蕪陋辭因為序次其事而系以銘
曰秀鍾山川志存經濟易道陰陽窮極奧義隨時變
易用適於治內振臺綱外肅邊鄙輶車所臨奸豪喪
氣禦寇安民丕昭功載懸車里門優游桑梓天不憖
遺溘焉長逝訃聞于 朝爰 賜以祭 恩典便蕃
光榮終始貞石勒銘昭示來裔

正議大夫資治尹太常寺卿夏公墓誌銘

成化庚寅五月十六日太常寺卿夏公以疾終於正

寢其子文振時任中書舍人聞訃號泣奉刑部郎中
孫瓊所狀公行實造予請銘按狀公諱景字仲昭號
居易姓夏氏世家太倉清河里曾祖君實祖文通有
隱德父以公貴封中書舍人贈太常少卿母某氏封
孺人贈恭人公生有異徵天資秀朗父母鍾愛之七
歲知嚮學作楷書有法度御史范敬先按臨儒者周
暉以公見范公口占七字句使屬對公即應聲范公
稱賞十三受學於司訓盧從龍時郡守姚善值國難
死之連逮甚衆禍且及盧學徒駭散公獨誓死與俱
卒得免盧嘗語人曰是子德器不凡孔融流也稍長

治春秋有名永樂甲午領鄉薦乙未登進士第入翰
林為庶吉士預脩性理大全諸書公初從朱姓後復
姓夏其名從永從日 太宗皇帝嘗召見謂曰太陽
麗天日宜加永上因改相為景士林榮之公以經術
進而書法特妙寢承 恩眷 賜第宅免朝參時備
顧問丙申 扈蹕還南都 仁宗在青宮 命公與
中書舍人朱孔易秀才凌宴知 同直東華門與春
坊贊善陳濟同校蘇文間復與尚書蹇義學士楊士
奇同事 宥密越明年 召赴北都書 宮殿榜又
明年會脩釋典集朝士及天下名僧善書者使各書

以進 太宗獨取公所書第一幸丑授中書舍人
仁宗登極以公直文淵閣封其父母及妻如制尋丁
父憂歸宣德中 召赴闕秩滿陞考功主事正統初
預修 仁宣二朝寔錄加五品俸 賜襲衣白金既
又 命書 御覽諸書 皇陵等碑屢承綵段楮幣
之賜已未秋乞歸省戊辰用薦遷知江西瑞州府事
公乃以慈良之心行簡易之政民便安之年穀屢登
盜賊屏息獄訟乃止遂修學校增廩餼關射圃建秀
文樓以勸勵師生景泰壬申入 朝遂留為太常少
卿 詰進中憲大夫加贈二親及配天順改元

英宗復辟特遷正卿階嘉議大夫公以老乞致仕歸
後九年以子文振舉職推 恩加公正議大夫資治
尹又以恩詔進公中奉大夫公生洪武戊辰八月日
至是卒壽六十三訃聞 上特遣官諭祭 命有司
營塋配任氏封孺人累贈淑人子男三長鉞以輸粟
授承事郎次即文振以善書受今職次鉞邑庠生女
十五孫男五公為人寬厚樂易善交際篤於親舊家
食時兄曷仕永寧丞坐繫都下公徒步赴之後曷謫
戍隆慶而弟杲亦從坐當徙遠公間關百里為得免
杲行會入翰林有 詔求能書士公言於當道舉曷

同事西掖竟脫其戍士論偉之公詩詞清麗書師陳
文事寫竹師王孟端泉石師靈仲圭筆法妙絕一時
見重四方士大夫競求之不得者以為恨海外諸國
若朝鮮日本使至必重購以歸事狀謂公一代名人
位躋九卿壽考令終於人間之福已備蓋信然矣公
塋以卒之明年四月日墓在東城之原於乎公昔來
自瑞州大臣有奉留公者予亦綴名疏末瞬息二十
年詎意又銘公之墓耶重以文振請不可辭遂序次
其事而銘之銘曰崑山之靈鍾為賢英生有異徵聰
敏夙成早擢科甲入直承明文學之富書法之精簡

在帝心中外馳聲爰從邇列晉陟九卿名遂身退壽
福交并卹典之頻終始光榮述行著銘永閱佳城

通議大夫禮部右侍郎李公墓誌銘

公諱紹字克述號拙庵姓李氏世家安成之淳山曾
祖芑龍有隱德工詩文祖伯魁積學弗仕以公貴贈
禮部右侍郎祖母劉氏贈淑人父遵武三贈至禮部
右侍郎母劉氏封太孺人累贈淑人公七歲而孤賴
祖母撫育教誨甫長補邑庠生宣德丙午以春秋領
鄉薦癸丑會試中經魁廷試賜同進士出身觀政秋
官繼奉使滇南北歸 朝廷合三科進士數百人拔

其尤者二十八人為庶吉士公其一也時詔比二十八宿賜詩勉勵命有司給筆札燈燭膳羞俾積學以俟大用公感激涕零益大進宣德乙卯擢翰林檢討預脩宣廟實錄五統戊午書成賜白金文綺并宴於西苑加正七品俸滿三載贈父如其官封母太孺人已未以剝員歸其年召復職充經筵官丙寅丁太孺人憂服闋之官己巳滿九載陞脩撰兼經筵講官景泰辛未同考會試壬申陞司經局洗馬兼舊職甲戌主考會試尋命奉祀南嶽還誥進奉訓大夫贈父母妻如制丙子修寰宇通

志成進右春坊右庶子兼翰林侍講天順丁丑改尚寶寺卿仍兼侍講掌院事未幾陞學士侍講讀

文華殿賜二品金織衣明年陞禮部右侍郎滿三

載誥進通議大夫贈二代并妻亦如制癸未會試

知貢舉甲申纂修英廟寔錄為副總裁書壘成稱

疾甚詔許暫歸時成化丙戌秋八月也既歸優游

田園足跡弗至城市疾稍愈親戚或勸之出公曰吾

老矣出將何為辛卯春國子監缺祭酒上命慎選

老成銓曹以公名進上即日降勅遣人驛

召公命未及門而公已卒實壬辰正月日距生永

樂丁亥十二月日壽六十五配曾氏先公卒子男六
環休寧縣丞玘國子生瑤監察御史璉國子生皆曾
出琛璠俱幼側室馮出女七孫男八曾孫一公天資
明敏刻苦問學六經書史至陰陽醫卜之書靡不通
究詩文清新謹嚴力追古作楷法猶美得晉唐筆意
善汲引後進其及門受業以科第功名顯者甚衆平
生抱負經濟明於世故達於政體事至物來處之有
餘居家務敦孝友與人交始終以誠見人急難極力
救援居官篤於忠義方北虜之變朝士家多南徙公
曰主辱臣死何以家為其在翰林職掌史事及考核

文字一循至公人莫敢干以私其知貢舉清宿弊士
論稱快初英廟復位有邀迎駕功者疆公與偕公
辭曰天命有位豈臣子所敢干陞侍郎公卿往賀冢
宰王公舉酒酌曰天選侍郎也蓋譏一時附勢倖進
者久之有諸公者乘間言曰李某奏事多南音
上不為動眷遇有加間從游西苑上問左右曰大
臣有曾至此者否對曰惟李侍郎賜宴於此是日
上賜群臣飲盡惟公歸著賜遊西苑記裕陵上賓
山陵之事公實領之孝恭章皇后喪禮今上婚
禮斟酌損益多出公意前後賜予不可勝紀公性剛

直早年頗欲面折人過晚歲惟務優容而其端謹介
特終始一節蓋自為檢討時已有公輔之望籍甚楊
文貞寢疾 上遣人詢問人材獨舉公四五人對以
寔後來進用之漸公卒士大夫識與不識咸痛惜之
上聞訃悼嘆遣官即其家 賜祭 命有司營葬事
墓在邑某山之原其塋也卜以卒之明年某月日子
瑤出巡兩浙還奉公門生太常卿劉紹和狀來乞銘
予與公同官詞林同侍 經筵又嘗同主試禮闈相
知益深義弗可辭遂略序事狀而銘之銘曰山川之
靈鍾而為人其人伊何蘊精含醕發策決科出際昌

辰文堪華國行足飭身孝友公忠蔚為名臣哲人云
亡不亡者存勒名藏幽垂示子孫

太子少保禮部尚書兼文淵閣大學士陳公墓

誌銘

成化戊子四月日太子少保禮部尚書兼文淵閣大
學士廬陵陳公卒訃聞 上嗟悼遣使賜賻鈔萬緡
贈榮祿大夫少傅謚莊靖命禮部自初喪至葬皆遣
官諭祭工部具棺槨營葬事兵部給驛舟歸其喪公
之子璵奉大理卿王同節狀來請銘按狀陳氏先湖
廣茶陵人宋理宗時大常丞蘭孫之子馨因客遊廬

陵遂家大櫟里尋遷里之岡南傳八世徙大櫟之瑞
溪即今所居也曾祖子時祖弘德父大訓皆隱德弗
仕後以公貴贈祖考皆資政大夫正治上卿禮部尚
書兼翰林院學士祖妣彭氏妣高氏繼朱氏曾氏皆
贈夫人公諱文字安簡號聚齋自幼穎敏七八歲時
即知向學為父母鍾愛十五遣遊邑庠從師受詩經
已而憲臺按臨升之郡學遂中宣德乙卯江西解元
明年中禮部會試 廷試賜進士及第授翰林院編
修階承事郎己未滿考 勅進階文林郎封父如其
官母妻皆孺人時公在重慶奏乞歸省升堂拜壽鄉

人榮之辛酉復任癸亥丁外艱丙寅服闋仍舊職預
修五倫書丁卯 詔簡翰林臣十人進學 東閣兼
侍 經筵公其一也未幾充講官己巳滿九載陞侍
講景泰庚午秋主考順天鄉試號為得人明年以少
保高文義公薦陞雲南右布政使時雲南民苦於供
給貴州糧餉令商賈往貴州者為民代輸給還白金
溢其所代之數於是民商兩便歲省費十之五所屬
稅課司歲課七十餘萬例給官吏俸率多逋負公痛
懲其弊為立法俾守之歲課自是充溢其他政事有
益於公私者行之多類以三載蒙 誥旌異進通議

大夫贈祖若考皆如其官祖妣母妻皆封贈夫人天
順丁丑 英廟復位念公舊臣陞廣東左布政使以
內艱不果戊寅驛召至京拜詹事府詹事以母喪未
除上疏乞終制弗允時 今上在東宮公日侍 講
筵陳說經史多所裨益癸未陞禮部右侍郎兼翰林
院學士入 內閣叅預機務甲申 今上嗣位以公
舊在東宮陞吏部左侍郎兼職如故時四方多事民
疲於供需公言於 上凡造作科差諸不急之務悉
以罷之他如兵民利弊當建革者多密奏行之尋
同知 經筵事賜白金文綺羅衣犀帶三月廷試充

讀卷官奉勅修 英廟實錄公充總裁官乙酉三月
陞禮部尚書五月 賜誥階資政大夫正治上卿
贈祖考皆如其官丙戌三月廷試充讀卷官 冊封
賢妃充正使封 沂王 徽王充副使俱受白金綵
段之賜丁亥八月 命釋奠先師 實錄成陞太子
少保兼文淵閣大學士尚書如故賜宴及白金綵段
襲衣鞍馬戊子二月奉 命釋奠先師三載滿吏部
以聞 上遣中使賜寶鈔羊酒未謝得疾 上復遣
中使臨問太醫院官視療再越月竟以弗起距其生
永樂乙酉某月日壽六十有四公器識宏遠剛方有

為遇事能斷平居不為外飾為文一根於理在詹事
時職務頗簡名其燕處之所曰需軒中置圖史客至
相與論文賦詩談笑為樂平生急於賑人之乏揚人
之善事利於人毅然行之無所顧忌尤疾惡過甚不
肯依阿假借以是屢召怨於人配李氏贈夫人子男
三孫男五所著有聚齋稿需軒稿若干卷藏于家其
塋以卒之某年月日墓在羅義山之原予昔與公同
官翰林同被選入 東閣同進 經筵為講官雅相
好也文義之薦予實贊之臨別有不敢不勉以求無
負相知之語 英廟復位首召臣輅至前俯賜慰問

已而問公何在予以任雲南布政為對 上頷之未
幾予被讒罷歸不意十年後復與公同事而公遽已
矣為之惻然因不辭而銘之銘曰廬陵陳氏遷自湖
南積善累仁世澤渾涵篤生英賢詩書是耽制科魁
選近侍常參牧伯端尹政務熟諳晉入宥審公寔奚
慚方茲倚毗曷遽云亡 當宁興嘆縉紳含戚爰錫
之謚爰進之秩 恩典頻繁式昭舊德羅義之山佳
城鬱鬱述行著名垂示無極

贈程進士二親墓誌銘

程氏世居淳安邑市之西詩禮舊族也程氏敏恭富

而好禮忠厚士也借其配方孺人先後以疾終於正
寢子愈卜成化戊戌十二月甲寅奉柩合塋浪滄山
之麓從吉兆也已而愈登事丑丑奉榜進士念二親
澤德未白奉鄉先達胡都憲共之所述事狀來徵予
銘刻石墓隧圖永久也檉狀程氏系出新安黃墩鄱
陽太守文燦公後文燦子康寧仕為青溪丞因留家
為青溪今淳安也君諱俊用敏恭其子靜齋其別號
也曾祖斗祖庸皆隱弗仕父純字懋正精醫術任醫
學訓科有遺愛於人母鄭氏有賢行君性穎敏涉獵
經史通其大義孝奉二親友愛兄弟待族如鄉黨交

游善類仁而有禮敬而無失謙和遜順與物無忤處
已勤儉治家有法中年曾置膏腴田地視舊數倍費
產日裕積而能散人有假貸不牟厚利或貧不能償
者置之不問正統初應 詔輸穀二千石以實官廩
事 聞賜 璽書旌為義民成化間復應 詔輸穀
二千石援例授七品冠服階承事郎先是君久長區
賦催科弗擾人甚便之有別業在赤洲廩多餘積赤
洲之人衣食婚塋之費皆取給於君德之尤深東鄉
余垠負官租被迫將鬻妻以償君見其契券惻然即
為代償之垠夫婦感激飲食必祝赴市必望門而拜

邑令汪君為誌其事以風勵鄉俗君兄弟六人五皆
先卒撫其子女無異已出婚嫁以時禮必從厚平居
篤於教子特構屋數十楹於所居之左延文行之士
與愈朝夕游處以資講學愈由邑庠生擢辛卯浙闈
經魁君戒之曰慎毋以是自足當志其遠且大者丙
申春忽邁瘋疾醫藥弗効謂愈曰我殆弗起汝宜勉
力以成吾志言訖而逝時二月十日也距生永樂乙
酉七月二十八日春秋七十有二孺人方氏邑東名
家隱士之女仁慈孝敬克稱賢配凡君之所以祇應
內外敬尊撫幼咸得人之歡心者孺人助相之功為

多而愈之間學有成孺人訓諭之力尤至歲戊戌正
月二十六日卒春秋六十有八子男一即愈女三義
官鄭珊士人吳讚庠生應鵠其婿也孫男四文模文
楷文桓文桂孫女一愈天資謹厚綽有父風將來名
位未量推恩之典可計日而待矣予故為之銘曰程
氏世積篤生偉人惟敏恭甫望重縉紳好禮仗義惠
及鄉隣輸粟助賑兩沐殊恩驚服銀章榮於其身
孺人方氏內助稱賢家和而昌厥有由然惟子克肖
詩禮相傳黃甲登名耀後光前行躋膺仕雅恩自
天積善餘慶信有徵焉貞石勒銘賁于九泉

封御史應公二親墓碣銘

徵士應公彥質既卒且葬其子珪瑀復將礱石封其墓求予銘碣之應氏淳安右族世次見予所撰季文處士墓表徵士諱兆同字彥質季文處士長子也母沙氏徵士生而秀穎讀書明大義屢辭徵辟弗就居家孝養二親友愛諸弟惠於宗族睦於鄉黨晚年舉耆德邑大夫鄉飲每延至賓席隣里有爭必求徵士直之而徵士存心平恕人無老稚咸慕其德壽六十以疾終於正寢娶項氏稱賢配徵士生於洪武癸丑五月二十七日終於宣德壬子四月二十九日孺人

生於丁未十一月二十一日終於甲寅二月初二日享年八十有八男二長即珪以子貴封監察御史次瑀女一適邑人何澤孫男十顯正統乙丑進士兩任監察御史今陞大理寺丞煥焯焯焯碩頊景泰丙子進士次煊焯焯墓在邑之南鄉尚家源嗚呼予見徵士蓋謙和樂易非若世之悻悻者子孫貴盛方茲未艾則天之報善為足徵已是宜銘曰應之先世以孝友稱爰暨徵士式克紹承際時昇平屢辭徵辟素蘊未施厚德斯植肖子賢孫衣冠相繼既貴且富餘慶未艾天之報德不爽毫芒徵士善積奕世其昌南鄉

文毅公集 卷之八
之原幽堂深邃碣銘其石昭示來裔

文毅公集卷之八終

商文毅公集卷之九

後學漢陽劉體元編輯

慈谿章有德校正

庠生 徐鳴珊
汪學海

六世孫商 之相
之彛 同校

碑銘

資善大夫刑部尚書謚恭敏王公神道碑銘

成化甲午八月三日資善大夫刑部尚書王公以疾

卒訃聞 上悼念賻新鈔萬緡 賜謚恭敏 命禮

官 諭祭有司營葬事明年乙未葬某山之原又明

年丙申其子翰林編修臣詣闕稱謝退奉吏部左侍郎翰林學士劉時溫所述事狀造予石碑銘按狀公姓王氏諱槩字同節別號恕齋先世河東人唐時有諱仲銘者仕江西觀察使子孫因家廬陵之宣溪曾祖維嶽妣劉氏祖子善累贈大理寺卿妣黃氏贈淑人父仲起累封大理寺卿妣康氏累封淑人公天資穎悟自幼嗜學正統辛酉領江右鄉薦壬戌第進士甲子授刑部主事戊辰陞員外郎景泰庚午陞郎中公才識超卓推詢詳明同官皆雅重之辛未陞湖廣布政司右參政壬申調河南所至郡縣獄囚淹禁

公立為辨之奉勅修理河灣措置有法民不知勞乙亥陞按察使紀綱振肅圉圉空虛天順初被誣去任老幼攀號如失父母時襄王赴京見之上問官吏賢否首以公對即日宥還迎者歡呼載道已卯賜誥旌異未幾以憂去民不忍別哭聲震野壬午陞都察院右副都御史巡撫陝西歲飢設法賑濟流逋復業尋改大理卿處斷平允人以不寃官屬才賢推援恐後甲申今上嗣位及開經筵俱蒙白金文綺之賜成化癸酉陞刑部尚書革除宿弊疏陳十事咸切時政上嘉納之諸司呈稟案牘填委裁決

如流無不曲當其情明年忽遘疾 上命醫調治遣
中官 仔問兼 賜酒米等物竟以弗起距生永樂
戊戌某月日享年五十七妻劉氏累封淑人子男五
長棐舉人次即臣年十六舉進士改翰林庶吉士授
今官次某某女五孫男二公為人剛直方毅不容人
過處事明決雖疑獄積至十數年一訊即能別其真
偽凡所論列務存大體事有不便即抗章直言無所
顧忌學問該博為文雅偉詩尤清新好集唐句見古
書必寶愛蓄積甚富至於衣服飲食之類未嘗經意
視之泊如也時論刑名之精識見之優剛果有為如

公者無幾 上方注意用之而公遽即世可慨也已
銘曰廬陵王氏系出河東由唐而來號稱名宗詩書
承傳代不乏人惟大司寇益振厥聲立志高邁存心
剛直內外法司更迭出入有學有守有謀有斷燭照
數計群疑冰泮式敬爾獄長我王國昔聞蘇公今見
同節雄才卓識如公能幾胡不憇遺僅止於此 諭
祭有文 勅葬有墳穹碑勒銘垂示子孫

中順大夫通政司右通政陳君墓碑銘

中順大夫通政使司右通政陳君世用以成化三年
九月日卒於官 上聞悼嘆遣官 諭祭 命有司

給驛舟歸其喪其孤洵卜以明年秋奉柩塋錢塘西湖龍井之原謂墓道宜有碑奉魏侍御瀚所述事狀來乞銘按陳氏世家餘姚宋時有諱庚應與弟龍榮同舉咸淳進士者君七世祖諱嘉猷字世用號師硯曾祖逵道隱弗仕祖性善累官刑部吏曹郎中父名贄大理寺少卿母姚氏封恭人君自幼穎異立志超特侍少卿公宦遊南北從師授經習舉子業問學該博文采秀發景泰庚午領鄉薦明年會試登進士壬申使東廣時少卿公參議廣藩因得奉姚恭人便道抵任還拜禮科給事中值災變上言罷齋醮節供應

汰僧道清軍役祛民害凡五事又以秋霖傷稼歷言感召之由請君臣修德以弭災異戶部奏加兩京市征以通鈔法君言京師根本重地民非土著且歲歉豈宜厚歛借使鈔法通如民疲何他如嚴科舉之禁以抑僥倖厚儲積之法以備賑濟所言皆切時務疏入悉嘉納之少卿公入官太常君獲侍朝夕備極孝敬甲戌冬丁姚恭人憂歸襄大事哀毀踰禮天順改元服闋改刑科給事中時方多事君立朝正色敢言封駁彈劾不避權勢英廟深器重之嘗命左右識其姓名以俟大用已卯春奉命使朝鮮詰

其與女直交構罪詞嚴義正朝鮮君臣稽首謝過還
朝來歲通滿刺加請 上復命君充正使賜襲衣金
帶寶鏃至則宣布德意遠夷歸心逾年而還 上親
慰勞不數日陞通政司左叅議敷奏稱旨成化丙戌
陞右通政踰月聞少卿公喪援例守制 詔令安葬
畢起復上疏力辭弗允明年春赴京視事之餘衰服
麻衣哀慕弗少輟因得弱疾至秋轉甚醫莫能療遂
卒君生永樂辛丑六月日享年四十有七娶徐氏有
賢行封宜人子男一即洵增廣生孫男一君儀觀俊
偉心地坦夷孝友出於天性少卿公致政居錢塘以

奉養屬之弟以故弟嘉瑞嘗一試有司即棄所學日
娛侍親側而少卿公得優游晚景享無涯之樂以有
子之賢且孝也君持身廉介所至餽遺一毫無取與
人交誠意款曲久而益敬卒之日士夫皆驚惶失色
至為殞涕詩文渾厚豐蔚才思敏捷所著有師範集
皇華集出使紀行銀臺寓稿於乎君之位顯矣志行
矣使假之以年其所造詎可量哉余辱交于少卿公
而見厚於君非一日因洵之請遂為序次其大略而
系之銘曰餘姚陳氏為邑著姓宦學相承於今尤盛
吏曹太常爰及通政三世升 朝衣冠暉映有美通

文獻通考 卷之九
政才與德稱其學有本其志有定居家維何孝友忠
信居官維何動敏清慎淵謀精識休庸顯問具此衆
善亦復何恨未盡之祿遺于賢胤銘以述之來者考
證

資政大夫工部尚書兼大理寺卿趙君墓碑銘
君姓趙氏諱榮字孟仁別號三省世為陝西通渭人
唐末有諱頤者舉孝廉仕至嶺南安撫使南渡時有
諱澄者舉進士福州軍推官皆君遠祖也君祖諱彥
成國初以人才仕福州府織染局副使卒遂留家
於閩父諱仲敏與祖俱贈資善大夫工部尚書祖母

李氏母馬氏俱贈夫人君自幼穎敏嗜學涉獵經史
工真草篆隸宣德乙卯以善書薦預脩宣廟實錄
事竣正統戊午授中書舍人直文淵閣丁卯母卒
卜地阜城門外躬負土築墳塋之哀傷甚至有靈芝
甘露之異己巳秋八月從駕征迤北至土木虜寇
犯順君被重傷而回冬十月也先率衆犯京師假以
送駕為名索大臣出議衆皆恟惧君獨請往遂拜
大理寺右少卿充鴻臚寺卿偕通政叅議王君復至
德勝門土城外遇虜酋極口辯論謂爾等既云送
駕何乃沿途殺人及今戈甲蔽野殺掠益甚豈是好

意爾等若能歛兵而退奉送 聖駕至德勝門非但
文武百官雖 皇上亦親臨門迎候 朝廷所以報
賞爾者當亦不薄虜不從但云爾急回別遣文武大
臣數十人出議之君還具辭前職不允改授太常少
卿直閣如故明年七月 朝廷遣使迎請遂奉
聖駕以還陞工部右侍郎充正使往迤北脫脫不花
王處報謝還陞左侍郎管部事壬申奉 勅往張秋
督工築塞缺口水循故道舟楫弗阻天順丁丑
英廟復位陞本部尚書戊寅 誥封二代并妻如其
制庚辰進資政大夫奉 勅修建山川社稷等壇及

東安門南宮西苑靈臺等處樓閣殿宇事畢受綵段
寶楮之賜自是 眷遇日隆 上嘗呼其官而不名
每給 內帑高麗布綵繡雲鶴衣金帶噐皿時鮮等
物君感激益思報稱已而奸臣曹欽作亂君率官軍
討之擒其黨 賜勅嘉獎陞兼大理寺卿仍賚白金
綵幣壬午秋忽中風疾 上命太監裴當挾御醫診
視并賜藥餌米鈔羊酒明年乞養疾許之成化乙未
三月日卒壽六十四訃聞 上命禮官 諭祭工部
營葬事 恩典甚厚君賦性剛直立朝侃侃出使虜
庭氣不少挫卒能驚服強虜蓋疏通磊落士也配金

氏封夫人自幼聰穎善柔閑於內訓精於女紅既歸
事姑惟謹姑嘗遘疾籲天求代姑疾尋愈凡君蒞官
勤慎弗避艱險實夫人有以相之入覲 中宮所得
賜物必以分諸親舊君染疾在告十有四年躬侍湯
藥未始懈君卒哀毀成疾相去五十二日而卒事聞
上又遣禮卿 諭祭工部營壙合塋于玉河鄉三里
河之原子男二長珙隨父使虜授錦衣衛世襲百戶
次珰以父功擢中書舍人女二孫男七珰具狀謁予
請銘將勒碑墓道以昭不朽予往時承乏 內閣凡
君出使逢虜及出蒞部事予實預推薦追念疇昔為

之憮然因不辭而銘之銘曰閔西趙氏來仕于閩留
家占籍遂為閩人篤生才賢為國蓋臣功存信史身
際 昌辰位登八座秩兼九卿夫歿婦繼無愧平生
勅賜塋祭同沐恩榮勒碑墓道式表令名

文淵閣大學士謚文憲彭公神道碑銘

成化乙未三月日少保吏部尚書兼文淵閣大學士
彭公卒訃聞 上悼惜不已輟朝一日贈特進光祿
大夫柱國太師謚文憲賜鈔萬貫 命有司給棺槨
營塋事禮部官 諭祭官其子頤以尚寶寺丞俾護
喪歸終制頤奉從叔侍讀學士彥實所具事狀以公

神道碑銘來請予自己巳巳秋與公同事 內閣至是
二十七年雖中間離合不一然相知為深銘其可辭
按狀公姓彭氏諱時字純道先世居番陽宋哲宗時
曰忠泰以判官知安福縣因家焉曾祖古清隱德弗
仕祖務威父毓義俱累贈兵部尚書兼翰林院學士
母王氏繼母余氏俱累贈夫人公自幼凝重嗜學穎
悟過人甫長從諸父受春秋習舉子業肆力群書淹
貫經義為文有奇氣下筆滔滔皆驚人語識者異之
正統辛酉舉江右鄉薦乙丑會試辭乙榜入太學潛
心勵志業以益進言動弗苟縉紳推重祭酒李忠文

公期待尤至戊辰會試名第三 廷試第一擢翰林

修撰己巳秋 英廟北巡時方多事奉 命入

內閣預知機務陞侍讀 賜金帶及五品服尋以繼

母喪懇乞終制壬申起復遷左春坊丙子修寰宇通

志成陞太常少卿兼侍讀天順丁丑正月有邀南城

迎 駕者公辭之曰豈可貪天之功已而貪功者皆

得罪 上特召公復入 內閣進兼翰林學士與李

文達同事公輔翊居多李心服之天順末錦衣指揮

關達恃寵忌李軋已因中傷之李幾得罪公為力辯

始解河南有衛官強橫或以謀反誣之公言其非得

末減冬寒病咳 上遣太監牛玉視疾且欲為營居第而 宮車晏駕矣 今上嗣統進吏部侍郎兼學士乙酉冬進兵部尚書兼學士如故丙戌秋乞歸省詔馳驛以往 賜道里費 命中貴護送抵家未踰月 手勅促赴朝丁亥二月至京六月以四川宣府遼東地震上疏條陳六事皆切時政八月 賜金織麒麟衣總裁 英廟實錄進太子少保文淵閣大學士尚書如故 賜宴及衣服鞍馬戊子陳莊靖公率公欲避首僚疏辭弗允自是益務建白有事輒與同官謀議獻替惟謹六月 慈懿太后崩疏請合塋祔

廟援引明切情詞慤至復叩閣力言請從禮制九月 慧見上疏言輔導無狀乞罷職不許又上疏乞痛加脩省以回天意修省之實外庭大政固所當先而宮中根本尤為至急伏望正名分均恩愛以廣繼嗣為宗社大計則人心自安災異自止陝西土達滿四反命都御史項忠往討之衆議洶洶欲再命將出師公執不可未幾捷至 上喜賜所俘人口各一是冬改吏部尚書 賜玉帶己丑冬無雪上疏言近日光祿寺之買辦各城門之抽分掊剋不堪而獻珍珠寶石者高估價值以規取府庫之財乞盡革以惠生民辛

卯二月以疾乞致仕弗許十一月冊立東宮

命公充副使彗復見上疏條陳七事上嘉納之且曰卿等宜益勉佐理壬辰復上疏極言時政闕失乞放歸田里不允公自己丑以後數以疾在告上累命醫視疾遣內臣致餽乙未正月滿尚書九載陞少保病日轉甚遂卒公平生無疾言處色至於論辦事理確然有定性不喜華靡於物尤愛惜非其義一毫不苟取與朋友交久而益敬人有善稱道之論薦人材未嘗私以語人嘗一主應天府鄉試一主考會試四為廷試讀卷官皆稱得人讀書深探性理曰此最

有益身心者為文章縝密純雅書端楷精勁類其為人
有文集若干卷正學階梯韻書正誤等編藏於家
配李氏累封夫人先卒子男三頴頤顯女一孫男二
公病革從弟即中彥充洎彥實往問候公曰死生常
理無足恠但冒居大位上不能報國下不能終養
老父為可歎耳無一語及家事於乎公與予心相知
而交相愛非一日正期同輔聖明勉臻來效而公
遽往矣予寧無戚然於中乎此予所為哭之而至於
失聲也叙次其事而系以銘曰鳳山龍岡儲精降神
篤生才賢學貫天人名魁甲第望重縉紳官居密勿

職典絲綸謨謀啓沃迪知忱恂歷事三朝執心忠
純功在國家澤被生民吁嗟文憲無愧師臣

兵部左侍郎李公神道碑銘

兵部左侍郎宛平李公用初成化乙未某月日卒距
生永樂甲午某月日壽六十有二上聞訃悼惜賻
鈔三千貫諭祭賜域以卒之年月日塋玉河鄉
之原村先塋也其孤浦奉司馬項公蓋臣所述事狀
請予以神道碑銘為請于與公文父誼弗獲辭按事
狀序而錄之序曰公姓李氏諱震字用初別號省庵
先世山西臨汾人元季曾伯祖希賢游宦于燕因家

宛平曾祖希曾贈禮部左侍郎妣榮氏贈淑人祖嘉
謨永樂中累官禮部左侍郎妣蔡氏封淑人父栗隱
德弗仕以公貴累贈兵部右侍郎妣王氏累贈淑人
公天資穎敏自幼嗜學稍長從經師受易習舉子業
弱冠以蔭補太學生徧友名士學業日進丁內艱哀
毀逾禮服闋領宣德乙卯鄉薦正統改元登進士改
庶吉士讀中秘書肆力問學詞林諸公深器重之辛
酉擢工科給事中職務修舉嘗持節往河南親
藩行冊封禮餽遺一無所受癸亥秋奉命掌科事
是冬陞右給事戊辰丁外艱哀毀如前喪葬祭一遵

朱子家禮己巳冬虜寇犯順京師戒嚴奪情起公守
東直門景泰改元 勅進階徵仕郎以己官贈其父
母贈孺人妻蔡氏封孺人辛未陞通政使司左叅議
適南京通政缺遂改蒞焉癸酉 誥進嘉議大夫加
贈其父如其官母妻贈宜人繼劉封宜人天順戊寅
陞南京兵部右侍郎辛巳 誥進通議大夫加贈故
父母妻加封繼室皆如制成化丙戌 召改兵部踰
年陞左侍郎進階勲正議大夫資治尹食正二品俸
辛卯奉 勅巡視紫荆關一帶山場置立界牌禁養
林木衛護關隘防禦賊寇還奏稱 旨壬辰清理武

官甲午丁繼祖母趙氏憂 詔奪情公上疏乞終制
上弗許葬畢復出視事忽遘瘡疾竟弗起公賦性醇
厚才識高邁居家孝友蒞官勤慎一門子弟皆教以
詩禮從弟巽舉甲戌進士歷監察御史鳳陽知府姪
瀛登壬辰進士觀政刑部皆公訓迪所致公任兩
京除弊興利政聲四達尤厚於故舊冬官孟侍郎初
仕南京住部堂後廡忽得疾卒同官諱之移斂廡外
公徃吊嘆曰孟公生為卿佐死可委於此乎立命復
還舊寢宛平陳定與公祖為友及歿其弟安留金陵
年老家貧且食指衆弗克返故里公至即為助舟歸

之其急於為義類此晚年創居室于太僕寺之右作
祠堂于左以奉四代考妣建垣西學堂于北以貯法
書名畫外壘石為山雜植花木士大夫至必延坐款
洽或留題而去祠之南結構壽亭于古椿之陰以為
偃息之所平生所著詩文有集藏于家娶蔡氏贈淑
人繼劉氏封淑人子男四長浦太學生蔡出次瀚冠
帶舍人次滇庠生次江女二俱劉出銘曰詩禮之族
簪纓之裔有美若人克善厥繼科甲成名黃門筮仕
進榮銀臺尋遷兵侍敷歷兩京幾四十祀才德足稱
功業無愧穹碑勒銘昭于永世

中憲大夫福建按察司副使周公墓碑銘

於乎此吾友憲副周公之墓公之卒以景泰癸酉六
月日其孤恂等以天順壬午某月日奉柩卜葬焉既
襄事遂造予乞銘將樹碑墓道以彰潛德於乎予曷
忍銘公墓耶雖然知公者莫予若銘固弗容辭因序
而銘之序曰公姓周氏諱瑄字弘璧行文一號勿齋
系出唐司徒墀之後先世汝南人宋時有諱明者舉
進士為太常丞建炎初扈蹕南渡僑居錢塘明後有
諱天昌者仕為嚴羈博士卜居淳安之南隅因家焉
高祖仁翁曾祖玄卿祖仲寧以隱德自高積而能施

鄉稱長者祖母童氏繼邵氏父景輝以公貴贈刑部主事母袁氏封太安人公蚤游邑庠授春秋習舉子業宣德壬子領鄉薦正統丙辰第進士明年授南京吏部主事庚申祖母邵歿公以嫡孫歸守制服闋改刑部戊辰陞員外郎明年陞福建按察司副使未幾以撫鎮建寧功進食三品祿三載進階中憲大夫景泰辛未丁母太安人憂還未除服竟以疾弗起距生永樂乙酉二月日享年四十有九公體貌豐偉舉止詳雅存心忠厚言不妄發居家篤於孝友逮事祖父母咸得懽心每恨祿不及父言之輒殞涕太安人在

堂官兩京時上章乞分俸代養入闕奉之以行扁所寓之堂曰怡萱晨夕之奉惟以悅親為念事二叔父如所生撫弟妹有恩父歿時弟未有室公為擇名門女同門友按察使洪君弼以妹配之手創別業與諸弟共太安人所遺物悉歸諸弟治喪一無所干而又仁于宗族惠于鄉黨叔祖父某伯父某某先後繼歿公皆市地塋之鄉人役於京師行囊弗自給者徃徃周之無德色其為學刻意勵行口誦心惟罔晝夜或懈賢師益友過從之暇問疑辨惑弗得弗措為文必傳經義才思泉湧下筆累數千言與人交開心見誠

視朋友事如已事力為處置識見卓異或以疑事見質一言而決靡不切中於理蒞政本於勤慎用法本於平恕剴裁之能同官嘆服詳讞之公人以不寃嘗審決南北直隸重刑多所平反所至人稱道之其在建寧撫傷殘之餘招新集之衆增城浚濠禦寇安民厥功尤偉 朝廷聞而嘉之遂有加俸之命復遣官齎賜織金文綺二表裡鈔百錠建寧士夫亦相率賦詩述公功德於乎公雖弗壽而其功德著於時若是復何憾焉公所造就士多成器至顯官所著有勿齋稿秋臺稿出使詠錄栢臺稿公配盧氏稱賢淑封安

人子男五長恂次恬巳卯鄉貢進士次忻次忭戊子鄉貢進士次懌女一許適予次子良輔今為大學生者孫男十二墓在邑西月山之陽予與公姻為連襟交為莫逆方將資公啓益以底晚成而公遽已矣惜哉銘曰汝南周氏祖太常建炎扈蹕來錢塘太常之後曰天昌卜居淳安世澤長自茲嗣續多俊良世以積德稱於鄉信知作善天降祥憲副承之益顯揚擢科入仕當富強歷官中外司刑網忠厚平恕心之臧德業聞望何昭彰子孫如玉森滿堂餘慶演迤渾未量穿碑屹立月山陽銘以著之耿不忘

文毅公集卷之九終

